

ՀՀ կառավարությանն առընթեր պետական եկամուտների կոմիտե
Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 21/1

23 ապրիլի 2014 թ.

Քննարկվեց «Սպեղանի» ՍՊԸ գանգատը ՀՀ ԿԱ ՊԵԿ 13.03.2014 թ-ի թիվ 1009341 ստուգման ակտի դեմ:

«Սպեղանի» ՍՊԸ գանգատում բերված փաստարկները.

2014թ-ի փետրվարի 18-ից մարտի 4-ը «Սպեղանի» ՍՊԸ-ում իրականացվել է բյուջեի հետ փոխհարաբերությունների ճշտության ստուգում, որով արձանագրվել են խախտումներ շահութահարկի և ԱԱՀ-ի գծով: Վերջինիս վերաբերյալ ունենք հետևյալ առարկությունները.

ԱԱՀ-ի բաժնում արձանագրվել է, որ ընկերության կողմից ստուգվող ժամանակահատվածում ձեռք բերված ապրանքների գծով մատակարարների կողմից էլեկտրոնային եղանակով դուրս գրված հարկային հաշիվներ չեն վավերացվել:

Հաշիվների վավերացումը բխում է մեր շահերից հետագայում հարկերը և ապրանքների շարժը ճիշտ հաշվարկելու համար, հետևապես անհասկանալի է, թե ինչու չպետք է վավերացնեինք դրանք: Միաժամանակ ցանկանում ենք հայտնել, որ մենք որևէ հնարավորություն չունենք ապացուցելու, որ այդ հարկային հաշիվները վավերացվել են, որովհետև դրանք էլեկտրոնային ձևով են կատարվում և մեր խորին համոզմամբ, դրանք ուղղակի ծրագրի խախտման հետևանքով դուրս են մնացել, որն էլ ստուգելը բավականին դժվար է: Բացի այդ, եթե մենք չենք վավերացրել մատակարարի կողմից դուրս գրված հարկային հաշիվները, դա նշանակում է, որ մենք չենք ստացել ապրանքները: Ինչպես է, որ Մասիսի ՀՏ-ն այդ մասին մեզ չի տեղեկացրել ամբողջ տարվա ընթացքում, չէ որ դրանք չկատարված գործարքներ են, այսինքն՝ մատակարարը նույնպես ունի խնդիրներ: Եթե տեղեկացնեին ժամանակին, մենք կուղղեինք մեր սխալը, և ամեն ինչ ճիշտ կլիներ: Էլեկտրոնային եղանակը պետք է հեշտացներ մեր աշխատանքը, այլ ոչ թե լրացուցիչ խնդիրներ ստեղծեր:

Այսպես, ստուգողների կողմից արձանագրվել է, որ հարկային հաշիվների վերաբերյալ տեղեկություններ հարկային մարմին չեն ներկայացվել, որի պատճառով ԱԱՀ-ի պակասեցումը չի ընդունվել:

ա. 2012 թ-ի ընթացքում թվով 17 հաշիվների համար Մասիսի հարկային տեսչություն էլեկտրոնային տեղեկություն ներկայացվել է, որտեղ ճիշտ նշվել է մատակարար ընկերությունների անվանումները, ՀՎՀՀ-ները, հատուցման ենթակա ընդհանուր գումարները և հարկային հաշիվներում առանձնացված ԱԱՀ-ի գումարները (գանգատում նշված են թվով 17 հաշիվների վերաբերյալ տվյալները): Սակայն, քանի որ հարկային հաշիվների սերիա-համարները սկսվել են 0-ով, ծրագիրը չի ընդունել 0-ն և 0-ն տարել է համարի վերջ: Այսինքն, ընկերությունը լրացրել է ճիշտ, սակայն ծրագրային խնդիրների հետևանքով սերիա-համարները փոխվել են, ուստի նշված ամիսների համար արձանագրված խախտումը 709470 դրամ ընդհանուր գումարով, չենք ընդունում: Ի վերջո, նշված 17 հարկային հաշիվների վերաբերյալ տեղեկությունները ներկայացվել է օրենքով սահմանված ժամկետում:

բ. 25.06.2012 թ-ին «Վագա-Ֆարմ» ՍՊԸ-ից էլեկտրոնային եղանակով ստացվել է 2 հարկային հաշիվ, որոնց վերաբերյալ Մասիսի ՏՀՏ ներկայացվել են տեղեկություններ, սակայն հարկային հաշիվների սերիա-համարները ներկայացվել են մեկը մյուսի փոխարեն:

Ինչպես նաև թվով 8 հարկային հաշիվների վերաբերյալ Մասիսի ՏՀՏ տեղեկություններ ներկայացվել է, սակայն նշված տեղեկություններում 2 հարկային հաշիվի սերիա-համարներում մեկ նիշ սխալ է գրվել, իսկ 6-ի սերիա-համարները թյուրիմացությամբ այլ սերիա համարներ է գրվել:

Հայտնի փաստ է, որ 25.06.2012 թ-ին «Վագա-Ֆարմ»-ից ստացվել է միայն 2 հարկային հաշիվ նշված գումարներով, «Ալֆա-Ֆարմ» և «Դեղաբազա Երևան» նշված օրերին համապատասխան հարկային հաշիվներով ստացվել են ապրանքները և հարկային տեսուչները չեն ապացուցել, որ բացի այդ հաշիվ-ապրանքագրերից առկա են նաև այլ մատակարարումներ և հարկային հաշիվներ, որոնց վերաբերյալ մենք տեղեկություններ չենք ներկայացրել: Ուստի դրանք

նույնպես չեն կարող դիտվել որպես չներկայացված տեղեկություններ: Այդ հարկային հաշիվների վերաբերյալ արձանագրված խախտումը, ընդհանուր գումարով 383399 դրամ, նույնպես ընկերությունը չի ընդունում:

Վերը նշված ակտում հարկային տեսուչները մեջբերել են ՀՀ կառավարության 07.07.2011 թ-ի թիվ 937 որոշման պահանջների խախտման վերաբերյալ, սակայն տվյալ որոշման 12 և 13 կետերի համաձայն հարկային տեսչություն ներկայացված տեղեկանքում որևէ հարկային հաշվի վերաբերյալ տեղեկություններում անճշտություններով լրացնելու դեպքում, տվյալ հարկային հաշվի տեղեկությունը չի համարվում սխալ ներկայացված, եթե տեղեկանքում ճիշտ է լրացված ՀՎՀՀ-ն և հարկային հաշվում առանձնացված ԱԱՀ-ի գումարը:

գ. 2012 թ-ի ընթացքում ընկերությունը ստացել է թվով 76 հարկային հաշիվներ, որոնցում առանձնացված ԱԱՀ-ի գումարները 20000 դրամից փոքր են, այսինքն՝ ՀՀ կառավարության 07.07.2011 թ-ի թիվ 937 որոշման 4-րդ կետի համաձայն ԱԱՀ վճարող համարվող անձինք յուրաքանչյուր եռամսյակի արդյունքներով իրենց հաշվառման վայրի հարկային մարմիններին ներկայացնում են տեղեկանք այն հարկային հաշիվների վերաբերյալ, որոնցում ցույց տրված հարկվող շրջանառության մեծությունը առանց ԱԱՀ-ի, գերազանցում է ՀՀ կառավարության կողմից սահմանված չափը: ՀՀ կառավարության 30.05.2001 թ-ի թիվ 481 որոշման համաձայն, որը գործում է մինչ օրս, ԱԱՀ վճարող համարվող անձինք իրենց հաշվառման վայրի հարկային մարմինն ներկայացնում են տեղեկություններ տվյալ հաշվետու ժամանակաշրջանում մատակարարներից ստացված և իրենց կողմից դուրս գրված այն հարկային հաշիվների վերաբերյալ, որոնցում ցույց տրված հարկվող շրջանառության արժեքն առանց ակցիզային հարկի և ԱԱՀ-ի գերազանցում է 100.000 դրամը: Հարկ է նշել, որ վերը նշված հարկային հաշիվներում ԱԱՀ-ով հարկվող շրջանառությունը չի գերազանցել 100.000 դրամը, գերազանցող մասը եղել է ԱԱՀ-ից ազատված մասը, ուստի նշված հաշիվների վերաբերյալ «ԱԱՀ-ի մասին» ՀՀ օրենքի 20 հոդվածի, ինչպես նաև ՀՀ կառավարության 07.07.2011 թ-ի թիվ 937 և 30.05.2011 թ-ի թիվ 481 որոշումների համաձայն տեղեկություններ կարող էինք չներկայացնել:

Դեղերի ոլորտը ունի որոշակի առանձնահատկություն, մեկ մատակարարման ժամանակ կարող են մատակարարվել ինչպես ԱԱՀ-ից ազատված, այնպես էլ ԱԱՀ-ով հարկվող դեղեր, և մեկ հարկային հաշվում դրանք ըդգրկելով դեռևս չի նշանակում, որ ԱԱՀ-ով հարկվող շրջանառությունը դա հարկային հաշվի հատուցման ընդհանուր գումարն է: Ուստի 2012 թ-ի 76 հարկային հաշիվների մասով արձանագրված գումարը 1.270.257 դրամ, նույնպես չի ընդունվում:

դ. 2012 թ-ի հունվար ամսվա համար Մասիսի ՏՀՏ ներկայացվել են էլեկտրոնային տեղեկություններ ձեռք բերված հարկային հաշիվների վերաբերյալ, սակայն ընկերության համոզմամբ տեղի է ունեցել կապի ընդհատում, որը կարող են հաստատել բազմաթիվ այլ ընկերություններ, որոնք հարկային տեսչություն ներկայացնում են էլեկտրոնային տեղեկություններ: Կապի ընդհատման պատճառով հունվար ամսվա նույն օրով և նույն ժամով ուղարկված թվով 31 հարկային հաշիվներից տեղեկություններում չի ներառվել հունվար ամսում ստացված վերջին թվով 5 հարկակային հաշիվների վերաբերյալ տեղեկությունները:

Ուզում ենք նշել, որ բոլոր դեպքերում մեր կողմից տեղեկություններ չներկայացնելու դիտավորություն չի եղել, քանի որ տեղեկություններ ներկայացնելը առաջին հերթին բխում է ընկերության շահերից: Այս դեպքում ևս տեսուչների կողմից արձանագրված 2012 թ-ի հունվար ամսվա համար ԱԱՀ-ի ընդհանուր գումարը 265.044 դրամ, նույնպես չենք ընդունում, քանի որ տեղեկությունները հարկային տեսչություն ուղղարկվել են ամբողջությամբ 31 հարկային հաշիվների վերաբերյալ և առանձնացումներ չեն արվել:

ե. 2013 թ-ի հուլիս ամսում ստացված հարկային հաշիվների վերաբերյալ 13.10.2013 թ-ին ժամը 15:38 րոպեին վավերացվել է նշված հարկային հաշիվների ստացումը, սակայն կապի ընդհատման պատճառով համակարգը չի հիշել մեր կողմից վավերացման փաստը: Դա է վկայում այն հանգամանքը, որ համակարգը հիշել, ֆիքսել է տվյալ ամսում ստացված ցանկից առաջին երկու և նախավերջին երեք հարկային հաշիվների վավերացումը: Անտրամաբանական է, որ մեր կողմից վավերացվի 2013 թ-ի հուլիս ամսում ստացված թվով 61 հարկային հաշիվների ցանկից միայն առաջին երկու և նախավերջին երեք հարկային հաշիվները: Նշեմ նաև, որ հարկային հաշիվների վավերացված լինելու փաստը մեր կողմից դժվար ապացուցելի է: Նշված 61 հարկային հաշիվներից 56-ի ԱԱՀ-ի ընդհանուր գումարը կազմում է 2.077.047 դրամ, որը արձանագրվել է տեսուչների կողմից և ընկերության կողմից ընդունելի չէ:

Համակարգի հետ կապը հաճախակի է ընդհատվում կապված ինտերնետ կապի ցածր որակի, ինչպես նաև համակարգի ծանրաբեռնվածության հետ: Պա կարող են վկայել բազմաթիվ ընկերություններ, որոնք հարկային տեսչություն ներկայացնում են էլեկտրոնային տեղեկություններ: Բացի այդ, անհրաժեշտ է նշել, որ Մասիսի ՀՏ կողմից ոչ մի անգամ նշված փաստի կամ անհամապատասխանության համար չի տեղեկացվել, կամ ծանուցվել:

Ելնելով վերը շարադրվածից ընկերությունը չի ընդունում նշված մասերով արձանագրված ԱԱՀ-ի գծով խախտումները և խնդրում է այդ մասերով ակտը համարել անվավեր: Նշված ստուգման ակտից չի առարկում /համաձայն է/ շահութահարկի մասով առաջադրած խախտման գումարը և ԱԱՀ-ի մասով տեսուչների կողմից արձանագրված այն փաստը, որ 2013 թ-ի նոյեմբերի 18-ին վավերացվել է 2013 թ-ի մարտ, ապրիլ, մայիս և հունիս ամիսների հարկային հաշիվները, ընդհանուր գումարով 490.223 դրամ, և ընկերության կողմից չեն տրվել տեղեկություններ 2012 թ-ի 5 հարկային հաշիվների վերաբերյալ, որոնք ստացվել են «Ալֆա-Ֆարմ» ընկերությունից:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները, եկավ հետևյալ եզրակացության:

ա. 2012 թ-ի ընթացքում թվով 17 հաշիվների վերաբերյալ Մասիսի ՏՀՏ էլեկտրոնային եղանակով ներկայացված տեղեկությունների վերաբերյալ նշվեց հետևյալը.

Նախ ստուգումն իրականացրած անձինք նշեցին, որ խոսքը վերաբերվում է ոչ թե թվով 17, այլ՝ թվով 16 հաշիվներին:

Հանձնաժողովը, ուսումնասիրելով վերոգրյալ թվով 16 հաշիվների վերաբերյալ Մասիսի ՏՀՏ էլեկտրոնային եղանակով ներկայացված տեղեկություններն արձանագրեց, որ ըստ էության ընկերության կողմից թույլ տրված խախտումները կրում են ձևական բնույթ, քանի որ պահպանվել են ՀՀ օրենսդրությամբ նախատեսված վավերապայմանները: Մասնավորապես, ներկայացված տեղեկություններում ճիշտ են նշվել մատակարար ընկերությունների անվանումները, ՀՎՀՀ-ները, հատուցման ենթակա ընդհանուր գումարների և հարկային հաշիվներում առանձնացված ԱԱՀ-ի գումարների չափը: Պարզապես, քանի որ հարկային հաշիվների համարները սկսվել են 0-ով, ծրագիրը այդ 0-ները տեղափոխել է համարի վերջ: Հետևապես, ղեկավարվելով «Վարչարարության հիմունքների և վարչական վարույթի մասին» ՀՀ օրենքի 5-րդ հոդվածի դրույթներով, որի համաձայն. «Վարչարարություն իրականացնելիս վարչական մարմիններին արգելվում է միայն ձևական պահանջների պահպանման նպատակով անձանց ծանրաբեռնել պարտականություններով կամ մերժել նրանց որևէ իրավունք տրամադրելը, եթե նրանց վրա դրված պարտականությունները բովանդակային առումով կատարված են», ընկերության գանգատը վերոգրյալ թվով 16 հաշիվների գծով արձանագրված պարտավորությունների մասով ենթակա է վերանայման:

բ. «Վազա-Ֆարմ» ՍՊԸ-ից էլեկտրոնային եղանակով ստացված 2 հարկային հաշիվների վերաբերյալ ներկայացված տեղեկությունների (հարկային հաշիվների սերիա-համարները ներկայացվել են մեկը մյուսի փոխարեն), ինչպես նաև թվով 8 հարկային հաշիվների վերաբերյալ ներկայացված տեղեկությունների (տեղեկություններում թվով 2 հարկային հաշիվների սերիա-համարներում մեկ նիշ սխալ է գրվել, իսկ թվով 6 հարկային հաշիվների սերիա-համարների փոխարեն այլ սերիա-համարներ են գրվել), նշվեց հետևյալը:

«Ավելացված արժեքի հարկի մասին» ՀՀ օրենքի 43.1-րդ հոդվածի համաձայն. «Ձեռք բերված ապրանքների և ստացված ծառայությունների գծով մատակարարների կողմից դուրս գրված այն հարկային հաշիվներում առանձնացված ԱԱՀ-ի գումարները, որոնց վերաբերյալ, սույն օրենքի 20 հոդվածին համապատասխան, հարկային մարմին տեղեկություններ (այդ թվում՝ ճշգրտված) չեն ներկայացվել կամ որոնց վերաբերյալ ներկայացված կամ չներկայացված տեղեկությունները չեն համապատասխանում հարկային հաշվում արտացոլված տվյալներին (վավերապայմաններին)՝ հաշվանցման ենթակա չեն»:

Քննարկվող դեպքում «Վազա-Ֆարմ» ՍՊԸ-ից էլեկտրոնային եղանակով ստացված 2 հարկային հաշիվների և թվով 8 հարկային հաշիվների վերաբերյալ ներկայացված տեղեկությունները չեն համապատասխանում հարկային հաշիվներում արտացոլված տվյալներին

(վավերապայմաններին), հետևապես հարկային հաշիվներում առանձնացված ԱԱՀ-ի գումարները հաշվանցման ենթակա չեն, ինչը և արձանագրվել է ստուգման ակտով:

գ. 2012 թ-ի ընթացքում ընկերության կողմից ստացված թվով 76 հարկային հաշիվների վերաբերյալ, որոնցում առանձնացված ԱԱՀ-ի գումարները 20.000 դրամից փոքր լինելու պատճառաբանությամբ ընկերության կողմից տեղեկություններ չեն ներկայացվել, նշվեց հետևյալը:

«Ավելացված արժեքի հարկի մասին» ՀՀ օրենքի 20-րդ հոդվածի համաձայն. «Տեղեկանքում ԱԱՀ վճարող անձը ներառում է տեղեկություններ միայն այն հարկային հաշիվների վերաբերյալ, որոնցում տվյալ անձին հարկային հաշիվ տրամադրած կամ նրանից հարկային հաշիվ ստացած անձի համար տվյալ հաշվետու ժամանակաշրջանում ստացված կամ տրամադրված հաշիվներում ներառված հարկվող շրջանառության արժեքը գերազանցում է Հայաստանի Հանրապետության կառավարության սահմանած չափը»:

ՀՀ կառավարության 30.05.2001 թ-ի թիվ 481 որոշման 1-ին կետի համաձայն, ավելացված արժեքի հարկ վճարող համարվող անձինք իրենց հաշվառման վայրի հարկային մարմին ներկայացնում են տեղեկություններ տվյալ հաշվետու ժամանակաշրջանում մատակարարներից ստացված և իրենց կողմից դուրս գրված (գնորդներին տրված) այն հարկային հաշիվների վերաբերյալ, որոնցում ցույց տրված հարկվող շրջանառության արժեքը (առանց ակցիզային հարկի և ավելացված արժեքի հարկի) գերազանցում է 100 հազ. դրամը:

Հանձնաժողովը գտնում է, որ հաշվետու ժամանակաշրջանում ստացված կամ տրամադրված հաշիվներում ներառված հարկվող շրջանառության արժեքը իր մեջ ներառում է ԱԱՀ-ով հարկվող և ԱԱՀ-ից ազատված շրջանառությունների հանրագումարը, քանի որ «Ավելացված արժեքի հարկի մասին» ՀՀ օրենքի 15-րդ հոդվածի համաձայն. «ԱԱՀ-ից ազատելը՝ հարկվող շրջանառության նկատմամբ այն չհաշվարկելն է»:

Բացի այդ, ՀՀ կառավարության 2011 թվականի հուլիսի 7-ի N 937-Ն որոշմամբ հաստատված կարգի 11-րդ կետի համաձայն. «Հարկային հաշվում ԱԱՀ-ով չհարկված (հարկից ազատված, հարկման օբյեկտ չհանդիսացող, հաստատագրված վճարով հարկվող և այլն) գործարքներ նշված լինելու դեպքում տեղեկանքի առաջին և երկրորդ մասերի աղյուսակի 6-րդ սյունակում լրացվում է տվյալ հարկային հաշվով հատուցման ենթակա ընդհանուր գումարը (ներառյալ ԱԱՀ-ով չհարկված շրջանառությունը)՝ առանց ԱԱՀ-ի»:

Վերոգրյալից հետևում է, որ հաշվետու ժամանակաշրջանում ստացված կամ տրամադրված այն հաշիվների վերաբերյալ, որոնցում ներառված հարկվող շրջանառության արժեքը (այդ թվում նաև ազատված) գերազանցում է 100 հազ. դրամը պետք է սահմանված կարգով ներկայացվելին տեղեկություններ, ինչը, սակայն, քննարկվող դեպքում ընկերության կողմից չի կատարվել:

դ. 2012 թ-ի հունվար ամսվա համար էլեկտրոնային եղանակով ուղարկված թվով 31 հարկային հաշիվների վերաբերյալ ներկայացված տեղեկանքում թվով 5 հարկակային հաշիվների վերաբերյալ տեղեկությունները ներկայացված չլինելու վերաբերյալ նշվեց հետևյալը:

Ստուգման իրականացրած անձինք նշեցին, որ ընկերությունը 2012 թ-ի հունվար ամսվա համար էլեկտրոնային եղանակով ուղարկված թվով 31 հարկային հաշիվների վերաբերյալ ներկայացված տեղեկանքում թվով 5 հարկակային հաշիվների վերաբերյալ տեղեկություններ չի ներկայացրել: Ընդ որում, ընկերության պատճառաբանությունները, որ նշված սխալը տեղի է ունեցել կապի ընդհատման պատճառով հիմնավոր չեն, քանի որ ներկայացված տեղեկանքում ի սկզբանե ներկայացվել են թվով 26 հարկակային հաշիվների վերաբերյալ տեղեկություններ: Այդ մասին է վկայում այն փաստը, որ տեղեկանքի վերջնամասում արտացոլված տվյալները (որտեղ նշվում են տեղեկությունների ընդհանուր հանրագումարի վերաբերյալ տվյալները) համապատասխանում են թվով 26 հարկային հաշիվների վերաբերյալ ներկայացված տվյալներին:

ե. Ընկերության կողմից 2013 թ-ի հուլիս ամսում ստացված թվով 61 հարկային հաշիվներից միայն թվով 5 հարկային հաշիվները սահմանված ժամկետում վավերացվելու վերաբերյալ, նշվեց հետևյալը:

Ընկերության ներկայացուցիչների պատճառաբանությունները այն մասին, որ 2013 թ-ի հուլիս ամսում ստացված թվով 61 հարկային հաշիվները սահմանված ժամկետում վավերացվել են, սակայն կապի ընդհատման պատճառով համակարգը հիշել է միայն թվով 5 հարկային հաշիվների վավերացումը չի համապատասխանում իրականությանը: Մասնավորապես, ՀՀ ԿԱ ՊԵԿ տեղեկատվական բազայում առկա տվյալների (Հարկատու 3 ծրագիր) ուսումնասիրությամբ կարելի է արձանագրել այն փաստը, որ հիշատակված թվով 56 հարկային հաշիվների վավերացումն

ընկերության կողմից կատարվել է ստուգման առաջին օրը՝ 18.02.2014 թ-ին, ժամը 20:00-ից հետո ընկած ժամանակահատվածում: Այսիքն, թվով 56 հարկային հաշիվների վավերացումն ընկերության կողմից կատարվել է ստուգման ընթացքում՝ ստուգող անձանց կողմից համապատասխան խախտման մասին ընկերությանը տեղեկացնելուց հետո: Այդ իսկ պատճառով նշված թվով 56 հարկային հաշիվները ստուգող անձանց կողմից դիտվել են որպես չվավերացված:

Հանձնաժողովի 15.04.2014 թ-ի նիստի քննարկման արդյունքում սույն գործի վերաբերյալ ընդունվել է որոշման նախագիծ, որի համաձայն ստուգման ակտի 4-րդ կետից նվազեցվել է ընդամենը 1.525.698 դրամ:

Ի կատարումն ՀՀ կառավարության 2010 թվականի հոկտեմբերի 21-ի «Գանգատարկման խորհուրդ ստեղծելու և վերադաս հարկային ու մաքսային մարմինների գանգատարկման հանձնաժողովների որոշումների քննարկման կարգը հաստատելու մասին» N 1361-Ն որոշմամբ հաստատված կարգի 4-րդ կետի, սույն գործի վերաբերյալ Հանձնաժողովի կողմից ընդունված որոշման նախագիծը և առնչվող նյութերը (գանգատի փաթեթը) ուղարկվել են վերադաս հարկային ու մաքսային մարմինների գանգատարկման խորհուրդ (այսուհետ՝ Գանգատարկման խորհուրդ):

Որոշման նախագծի վերաբերյալ Գանգատարկման խորհուրդը տվել է դրական եզրակացություն:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո թ ո շ ու մ է՝

ՀՀ ԿԱ ՊԵԿ 13.03.2014 թ-ի թիվ 1009341 ստուգման ակտի 4-րդ կետից նվազեցնել ընդամենը 1.525.698 դրամ, այդ թվում՝ ԱԱՀ 689.043 դրամ, տույժեր 343.229 դրամ, տուգանք 493.426 դրամ:

Որոշմանը չհամաձայնվելու դեպքում տնտեսավարող սուբյեկտի ղեկավարը կամ նրան փոխարինող պաշտոնատար անձն իրավունք ունի բողոքարկել դատարան:

Հանձնաժողովի նախագահ՝



Վ.ՄԻՐՈՒՄՅԱՆ